

PELAJAR 1

BUP KUDUS IANYA JAKU TUHAN

A. BUP TI PEMADU MANAH

Jaku Tuhan- Bup Kudus - ianya Bup ti pemadu manah enggi Tuhan. Bup tu enda sebaka enggau bup bukai. Bup tu siti Bup ti nyelai. Bup tu ditulis ulih beberapa iko orang ti enda sama, ti ngarang nitihka iring Roh Kudus (2 Tim 3:16).

Bup Kudus siti bup ti amat iya laku dijual ba dunya tu. Penyampau bup tu dijual selalu mayuh agi laku ari bup ti bukai.

Bup Kudus udah disalin ngagai mayuh leman bansa jaku orang bukai ianya lebih agi mayuh ari bup-bup ti bukai ti bisi ba dunya tu. Terubah ia suba Bup Kudus semina disalin dalam tiga leman bansa jaku, ianya, Jaku bansa Hebrew, Aramik, enggau Gerika. Bup kudus ti dikembuan kitai kemaya ari tu udah disalin orang ti bepenemu/bisi pemerli ti dalam ngujungka kitai diatu ulih bempu leka jaku, runding enggau peneka Tuhan.

Bup Kudus mega siti ari bup ti tuai ba dunya tu. Tebal agi turai iya ti lama dalam Bup Kudus udah nyadi enyau ka 4,000 taun ti udah lalu. Taja pia, diatu Bup Kudus tetap siti ari bup ti pemadu baru ba dunya tu laban dalam bup tu kitai tetemuka saut ari tanya tentang pengidup.

- Ari ni asal penatai aku?
- Nama kebuah aku bisi ditu/dunya?
- Kini ke penunga pengidup aku?

Taja pan Bup Kudus ngundan 66 iti bup-bup ti mit, tang iya tau disimpulka ngena siti rambai jaku ti munyi tu: Chara Allah Taala ngidupka mensia, ketegal pengerindu Iya.

Ba pun surat Bup Kudus kitai, kitai deka tetemu ka lis 66 surat ti bisi dalam Bup Kudus. **Bup Kudus dibagi ngagai dua iti bagi:**

- I. Penyanggup Lama; enggau
- II. Penyanggup Baru.

Penyanggup Lama madahka kerja Tuhan enggau anemiak Iya sebedau pengada Jesus.

Penyanggup Baru madahka tentang pengada Jesus, pengidup Iya, pengawa Iya ti nyelai ba senentang ngeraika orang sakit sereta ngampunka orang ti sakit enggau bedosa, pematI Iya ba kayu regang, pengangkat Iya ari mati enggau pemulai Iya ke serega.

Bup Kudus mega madahka lebih jauh agi tentang kuasa pengerai Iya, pengawa Iya ti ngampun mensia, nengah orang ti udah meda Iya pengudah Iya angkat ari mati. Sida ti nitihka ajar Jesus ngaga mayuh kerja nyelai sebaka ti selalu dipadahka Jesus (John 14:12).

Jaku ajar ti diajar ulih bala sida ti meda Iya (Jesus) lebuI Iya angkat ari pematI bisi ditulis dalam kitab Kerja Rasul. Jaku ajar tu ditulis ba maya lima puluh taun keterubah sepengudah pengangkat Tuhan Jesus ari mati. Tu meh setengah ari Penyanggup Baru.

B. PELAJARKA BUP KUDUS.

Kaul ti beguna ti ulih kitai ari pengidup tu ianya kaul antara kitai enggau Tuhan. Enggau macha Bup Kudus kitai mereti serta nemu bakani Tuhan nya, runding Tuhan, atur Iya sereta janji Iya enggau kitai.

Isi indeks ba pun surat Bup Kudus tau nulung kitai ngiga lumur lambar senentang Bup Kudus ia ti deka dipelajarka kitai. Kena mantu kitai ngiga siti-siti bagi ari Bup Kudus, orang ti nulis Bup Kudus udah nusun teks nyadi: Surat, Bagi ba dalam Surat, enggau Genteran jaku ba dalam bagi nya.

Chunto ia, lebu kitai ngiga siti ayat ari Bup Kudus ba senentang “Pemungkal 3:15”, tu reti ia,

- 1) SURAT Pemungkal
- 2) BAGI 3,
- 3) GENTERAN 15.

C. TU MEH JANJI TI PEMADU BESAI BA DUNYA

“Laban Allah Taala udah balat rindu ka dunya nya kebuah iya meri Anak Tunggal Iya, awak ka genap iko orang ti arap ka Iya enda tau mati, tang tau bulih pengidup ti meruan”, (John 3:16).

D. TUJU ARI JAKU TUHAN

“.....Bup Kudus, ti tau meri penemu, ti ngujung ka nuan bulih pengidup ti baru ulih pengarap nuan ka Jesus Kristus. Samua Bup Kudus endang bepun ari Allah Taala, lalu iya beguna bendar kena ngajar utai ti bendar, kena mantah penyalah, ngadu ka pendiau ti salah sereta ngajar pengidup ti lurus” (2 Tim 3:15,16).

“Kuasa Allah Taala empu udah meri ka kitai genap bengkah utai ti beguna ka pengidup enggau pendiau kitai ti nangi ka Allah Taala, ulih penemu kitai pasal iya ti udah ngangau ka kitai ulih mulia enggau pemadas iya” (2 Pet 1:3).

“Ngena jalai nya iya udah meri ka kitai samua semaya ti pemadu badas sereta beguna bendar. Ngambi ka ulih semaya nya kitai tau ngelari ka diri ari penyai ti bisi di dunya tu laban penginein tubuh mensia, lalu bulih bagi dalam pemisi enggau kuasa Allah Taala”, (2 Pet 1:4).

E. JAKU TUHAN MERI PENGIDUP

“Jaku ti udah disebut aku ngagai kita, iya nya Roh ti mai pengidup”, (John 6:63b).

1. Pengelandik Jaku Tuhan (ulih nempa semua utai)

“Tuhan bejaku, langit lalu nyadi, mata panas, bulan enggau bintang nyadi laban jaku Iya. Lebu iya bejaku dunya lalu nyadi; sereta iya nyebut samua utai lalu pegari” (Mzm 33:6,9).

F. JAKU TUHAN SEBAKA AI

1. Jaku Tuhan Meresi Pengidup

Kitai ngepunca pengidup ba dalam Perintah Tuhan enggau pendiau ti ‘udah dibasu enggau beresi’ seluruh pengidup kitai ngena Jaku Tuhan.

“Kita endang udah dituchi ulih jaku ti udah diajar aku ngagai kita” (John 15:3). Pedana megal surat Epesus 5:25-27.

2. Jaku Tuhan Nyaga Awakka Kitai Tetap Beresi

Jaku Tuhan, ti udah tumbuh ba dalam ati kitai, nyaga kitai ari dosa.

“Ni jalai sida ti agi biak ngintu pendiau diri tuchi? Ari ti ngasi ka pesan nuan. Aku deka ingat ka adat nuan dalam ati diri, ngambi ka aku enda bedosa ngelaban nuan” (Masmor 119:9,11).

G. JAKU TUHAN IANYA PENAMPAK PENGIDUP KITAI

“Nya alai kami megal lebih agi arap ka jaku ti ditusui sida nabi. Kitai megal patut ninga ka pesan nya, laban iya baka lampu ti manchar ba endur ti petang datai ka hari pegari, lalu penampak bintang pagi manchar dalam ati kitai” (2 Pet 1:19).

1. Jaku Tuhan Mai Reti Ngagai Dunya Ti Petang

“Jako nuan nyadi lampu ka tenggau aku, jako nuan meri penerang, lalu mai penemu ngagai orang ti apin mereti” (Masmor 119:105,130).

H. JAKU TUHAN PEMAKAI ROH

“Ko Jesus nyaut: Munyi ti udah ditulis, ‘Mensia enda ulih idup enggau roti aja, tang beridup ba samua leka jaku ti pansut ari mulut Allah Taala” (Mat 4:4).

1. Jaku Tuhan Negapka Pengarap

“Iya ti bendar menyadi, aku enda ulih bejaku enggau kita baka aku ti bejaku enggau sida ti ngembuan Roh Kudus; aku enda tau enda bejaku enggau kita baka kita ti agi nitih ka gaya pengidup mensia ti bedosa ari asal; baka anak mit dalam Kristus. Aku enda tau enda nupi kita ngena tusu, ukai pemakai ti kering, laban kita apin ulih makai utai ti kering. Indah diatu kita apin ulih makai iya” (1 Kor 3:1,2).

“Awak ka kita baka anak mit ti baru ada, ti selalu aus ka tusu ti ari Roh Kudus, awak ka ulih kita ngirup iya, kita tau mansang dalam pengidup kita dalam Tuhan” (1 Pet 2:2).

Perambu Tuhan ngagai setiap kitai dipadahka dalam surat Epesus 4:12-15:

“Iya ngereja nya kena nyendia ka semua nemiak Allah Taala ngereja pengawa orang kristian, kena niri ka tubuh Kristus. Nya alai kitai deka nyadi siti dalam pengarap kitai, enggau dalam kitai ngasai ka kuasa Anak Allah Taala. Kitai sama mansang tuai, datai ka nyadi chukup besai tuai sabaka enggau Kristus. Uдах nya kitai enda agi nyadi baka anak mit, dipangka ka gelumbang enggau dipuput ka rebut kia-kia nitih ka ajar orang ti ngelakar, ti ngiring orang ngereja penyalah ngena akal ti jai. Tang kitai patut bejaku ka utai ti bendar enggau ati ti penuh pengerindu, kitai enda tau enda mansang tuai dalam Kristus, ti nyadi kepala.”

I. JAKU TUHAN BAKA LEKA BENIH

Dalam surat Luke 8:14,15, Jesus nusui siti jaku sempama ngagai bala murid pasal siko penabur benih.

Ba ayat 11, Jesus madahka reti jako sempama nya: “leka benih ti ditabur ka nya jaku Allah Taala.” Peneka Tuhan ba pengidup kitai ianya hidup ti bebuah (Masmor 1:3).

“Lalu Allah Taala ti ngada ka benih ditanam kita enggau roti dempa kita, deka mega meri ka kita samua benih ti diguna kita lalu deka ngasuh iya tumbuh sereta ngeluar ka asil ti mayuh bepun ari penelap ati kita” (2 Kor 9:10).

J. JAKU TUHAN SEBAKA SITI PEDANG

“Lalu sambut pengelepas ka selapok kita, lalu jaku Allah Taala nyadi ka pedang ti diberi Roh Kudus ngagai kita” (Epesus 6:17). Peda mega Heb 4:12.

Bakani Jesus ngena ‘pedang’ ngelaban sitan lebuh maya lya kena penguji ba padang pasir (Luke 4:1-14).

K. JAKU TUHAN NULUNG KITAI BESAMPI

“Enti kita mengkang dalam Aku, lalu jaku Aku mengkang dalam kita, nya baru kita deka minta sebarang utai ti dikedeka kita, lalu utai nya deka nyadi ba kita” (John 15:7).

‘Minta meh sebarang utai ti dikedeka kita’ nya madahka reti ‘minta baka orang ti bempu hak – enggau kuasa (kena meri perintah)’. Diatu jaku ti kreatif (nempa) bisi ba dalam MULUT KITAI!

L. JAKU TUHAN MERI PENERING DALAM KITAI

“Nya alai genap iko orang ti ninga jaku aku tu, lalu ngasi ka iya, deka baka siko orang ti landik, ngentak ka rumah iya di atas batu. Amat rumah nya ditinggang ujan ti lebat, ai bah, lalu biau balai mangka ka iya; tang iya enda tumbang laban rumah nya di-entak ka atas batu” (Mat 7:24,25).

Jesus madahka orang ti landik ngaga rumah ba atas batu ngambarka orang ti ninga serta ngasi ka jaku Tuhan. Jaku Tuhan ngasuh pengarap kitai kering datai ka lebuh kitai kena penguji, kitai tetap mengkang tan.